



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo

GRADSKA UPRAVA

IZVJEŠTAJ
O REZULTATIMA JAVNE RASPRAVE
O NACRTU BUDŽETA GRADA SARAJEVO ZA 2022. GODINU

Sarajevo, decembar 2021. godine

Adresa: Hamdije Kreševljakovića 3
71000 Sarajevo, BiH
Tel: +387 33 407 443
Fax: +387 33 208 341
Email: grad@sarajevo.ba
Web: www.sarajevo.ba



SADRŽAJ

| | | |
|-----|--|---|
| I | DOSTAVLJENE PRIMJEDBE, PRIJEDLOZI, SUGESTIJE I MIŠLJENJA: | 3 |
| | 1. Klub vijećnika_ ca Naše stranke u Gradskom vijeću Sarajevo | 3 |
| | 2. Vedad Deljković – gradski vijećnik..... | 4 |
| | 3. Općina Stari Grad Sarajevo..... | 5 |
| | 4. Gradski muzeji Sarajevo | 6 |
| II | OČITOVANJE GRADSKO SLUŽBE FINANSIJA NA NACRT BUDŽETA GRADA SARAJEVO ZA 2022. GODINU | 6 |
| III | IZVOD IZ STENOGRAMA SJEDNICE GRADSKOG VIJEĆA GRADA | 7 |

Gradsko vijeće Grada Sarajeva, na sjednici održanoj 01.12.2021. godine, utvrdilo je Nacrt Budžeta Grada Sarajeva za 2022. godinu i odredilo rok do 13.12.2021. za javnu raspravu. U toku javne rasprave dostavljene su primjedbe, prijedlozi, sugestije i mišljenja na Nacrt Budžeta Grada Sarajeva za 2022. godinu, koje je razmatrala gradonačelnica Grada Sarajeva i zauzela stavove kako slijedi:

I DOSTAVLJENE PRIMJEDBE, PRIJEDLOZI, SUGESTIJE I MIŠLJENJA:

1. Klub vijećnika/ca Naše stranke u Gradskom vijeću Grada Sarajeva

“Prijedlog 1.

Potrošačka jedinica 100110007, ekonomski kod 6144 „JU Gradski muzeji“ Sarajevo, u tabeli Budžet Grada Sarajevo za 2022. godinu iznos „400.000“ mijenja se iznosom „450.000“.

OBRAZLOŽENJE:

Grad Sarajevo je osnivač jedine muzejske ustanove koja nema kustosa/icu. Kustosi rade na prikupljanju, organizaciji, zaštiti, promociji i istraživanju muzejske građe, izradi kataloga i usko saraduje sa restauratorima, preparatorima i konzervatorima i drugim kustosima. Svaki muzej bez ove vrste profesionalca osuđen je na propast.

Zahtjev ovog budžetskog korisnika za uvećanje godišnjeg budžetiranja od ukupno 164.000 KM teško je (ili nemoguće) ispoštovati u narednoj godini, ali sredstva za zapošljavanje kustosa/ice i nabavku nove muzejske građe, trebala bi se naći u budžetu.

Pravilnik o normativima i standardima za muzejsku djelatnost Kantona Sarajevo propisuje obavezu da svaka muzejska ustanova ima ne jednog, nego više kustosa/ica.

Prijedlog 2.

U odjeljku Tekući transferi neprofitnim organizacijama uvodi se novi ekonomski kod 6143 pod nazivom „Sufinansiranje organizacije Povorka ponosa 2022“ u iznosu 5.000 KM.

OBRAZLOŽENJE:

Jedan od ključnih prioriteta iz Mišljenja Evropske komisije jeste unaprjeđivanje zakonodavstva kako bi se svim građanima i građankama BiH obezbijedila prava na slobodu izražavanja i mirno okupljanje. To bi predstavljalo iskorak te približilo bi evropskim i međunarodnim standardima. BiH je jedna od rijetkih zemalja u Evropi u kojoj nisu legalizirani istospolni brakovi. Povorka ponosa je protest jedne obespravljene društvene grupe koja obitava u sekularnoj državi, koja svim građanima teži obezbijediti ista prava na svakom svom pedlju.

Međutim, o ovom aspektu to još uvijek ne uspijeva. Bosna i Hercegovina je 2019. postala posljednja država bivše Jugoslavije koja je organizovala manifestaciju ovakvog tipa.

Ova povorka održava se u Sarajevu i Grad Sarajevo treba, barem na simboličkoj ravni, podržati društvenu grupu kojoj su prava uskraćena.

Prijedlog 3.

U odjeljku Tekući transferi neprofitnim organizacijama, ekonomski kod 6143 pod nazivom „Podrška vrhunskom sportu“ iznos „80.000“ mijenja se iznosom „110.000“.

OBRAZLOŽENJE:

U budžetu za narednu godinu planirati 30.000 KM više kako bi se moglo provesti sufinansiranje organizacije Međunarodnog šahovskog turnira Bosna 2022, prvog međunarodnog biciklističkog brdskog maratona i ostalih važnih događaja vrhunskog sporta.

Prijedlog 4.

U odjeljku Tekući transferi neprofitnim organizacijama, ekonomski kod 6143 pod nazivom „Udruženje SFK 2000 Sarajevo (ženska profesionalna fudbalska ekipa“ iznos „20.000“ mijenja se iznosom „50.000“.

OBRAZLOŽENJE:

SFK 2000 je najuspješniji fudbalski klub u Bosni i Hercegovini. Šampionsku titulu su osvojili 18 puta, kup 10 te Superkup Bosne i Hercegovine dva puta. Igračice SFK 2000 već dugi niz godina čine kostur seniorske i juniorske reprezentacije Bosne i Hercegovine. Pored ovoga, klub je ostvario velike međunarodne uspjehe. S obzirom na sve uspjehe, Grad Sarajevo ovaj klub treba adekvatno i vrednovati.

Prijedlog 5.

U odjeljku „Kapitalni transferi drugim nivoima vlasti i fondovima“, ekonomski kod 6151 pod nazivom „Projekta obnove i rekonstrukcije Astronomskog opservatorija Trebević“ iznos „50.000“ mijenja se iznosom „60.000“.

OBRAZLOŽENJE:

Postoji bojazan da predloženi iznos može biti nedostatan da se uredi imovinsko-pravni odnosi i izradi sva potrebna projektna dokumentacija neophodna za dobijanje dozvola i saglasnosti. Sa dodatnih 10.000 KM sigurni smo da se u 2022. godini cijeli proces može dovesti praktično do dobijanja dozvole za građenje.”

Stav predlagača:

Prijedlozi se djelimično prihvataju.

Potrošačka jedinica 100110007, ekonomski kod 6144 „JU Gradski muzeji“ Sarajevo, u tabeli Budžet Grada Sarajevo za 2022. godinu iznos „400.000“ mijenja se iznosom „410.000“.

U odjeljku Tekući transferi neprofitnim organizacijama, ekonomski kod 6143 pod nazivom „Podrška vrhunskom sportu“ je već povećan u Nacrtu Budžeta Grada Sarajevo za 2022. godinu na iznos 80.000 KM, što predstavlja povećanje u odnosu na prethodnu godinu za 50.000 KM. Smatramo da dodatno povećanje ove pozicije nije moguće.

U odjeljku „Kapitalni transferi drugim nivoima vlasti i fondovima“, ekonomski kod 6151 pod nazivom „Projekat obnove i rekonstrukcije Astronomskog opservatorija Trebević“ iznos „50.000“ mijenja se iznosom „60.000“.

Ostali prijedlozi se ne prihvataju iz razloga što prihodovna strana Prijedloga budžeta Grada Sarajevo za 2022. godinu u odnosu na Nacrt nije imala opravdan osnov za povećanje, što je razlog nemogućnosti finansiranja predloženih primjedbi.

2. Vedad Deljković – gradski vijećnik

„U funkciji gradskog vijećnika podnosim prilog javnog raspravi na Nacrt Budžeta Grada Sarajeva za 2022. godinu:

Sarajevo Film Festival je internacionalna smotra filmske umjetnosti koja je proglašena od posebnog interesa za Grad Sarajevo. Ova manifestacija je održala naš kosmopolitski duh, skoro tri decenije slavi umjetnost i radi na promociji i afirmaciji glavnog bh grada.

Prestižni status koji sada uživa jedinstvena je prilika za promociju ovog grada i zemlje, ali je i značajan doprinos kreativnoj filmskoj industriji uopće. Kao grad koji krasi i prestižno, svjetsko priznanje UNESCO kreativnog grada filma, jačamo brend koji nam donosi direktnu razvojnu i finansijsku korist. Ovaj razvojni i kulturni projekat otvara Sarajevo prema svijetu, u fokusu je pažnje svjetskih filmskih znalaca i svake godine privlači stotinama hiljada posjetilaca. Sve što ulažemo u SFF i slične događaje, mnogostruko se vraća, ne samo Gradu, nego i Kantonu, općinama i njihovim budžetima.

Osim toga, kreira platformu na kojoj domaća i internacionalna publika može vidjeti najnovije filmove koje potpisuju mladi Srednje i Istočne Evrope, uključujući i najnovija ostvarenja mladih domaćih, bosanskohercegovačkih autora. Festival ne samo daje otkrio danas uspješne i priznate filmske redatelje, glumce i scenariste, već njegovi organizatori dovedu u naš grad i najpoznatija imena sedme umjetnosti. Nesumnjivo, "Počasno Srce Sarajeva" kuca u svim Sarajkama i Sarajlijama, zajedno sa velikanima regionalne, evropske i svjetske filmske industrije. U godinama koje su pred nama će, kao i do sada, biti jedinstven most između ljudi, gradova, zemalja, kultura i religija, zato predlažem da se u budžetu Grada za 2022. godine podrži sa 200.000 KM."

Stav predlagača:

Primjedba se prihvata.

Pozicija „Sufinansiranje Sarajevo film festivala“ planirana je Nacrtom Budžeta Grada Sarajeva u iznosu od 100.000 KM i u Prijedlogu Budžeta Grada Sarajeva za 2022. godinu se povećava za dodatnih 100.000 KM, što ukupno iznosi 200.000 KM.

3. Općina Stari Grad Sarajevo

„U skladu sa Zaključkom Gradskog vijeća broj:01-GV-02-1560-1/21 od 01.12.2021.godine, kojim se Nacrt Budžeta Grada Sarajeva za 2022. godinu upućuje u javnu raspravu u trajanju do 13.12.2021. godine, Općina Stari Grad Sarajevo se uključuje u javnu raspravu i delegira sljedeće projekte:

- Izgradnja poslovnog objekta – Galerija Berber.....300.000,00 KM
- Sanacija fasada stambeno poslovnih objekata u užem gradskom jezgru Općine Stari Grad Sarajevo..... 300.000,00 KM
- Popločavanje Trga oslobođenja - Alija Izetbegović.....100.000,00 KM
- Uspostavljanje javne rasvjete u Tunelu „Vratnik“ na magistralnom putnom pravcu M5 100.000,00 KM
- Uređenje dijela lokalne saobraćajnice Bentbaša – Kozija Čuprija – Lapišnica – M5 (potez Dariva – Kozja čuprija).....80.000,00 KM.”

Stav predlagača:

Primjedbe se ne prihvataju.

Projekat „Uspostavljanje javne rasvjete u Tunelu „Vratnik“ na magistralnom putnom pravcu M5“ će se realizovati iz sredstava Budžeta Grada Sarajevo za 2021. godini, na osnovu već potpisanog Sporazuma.

Projekat „Uređenje dijela lokalne saobraćajnice Bentbaša – Kozija Čuprija – Lapišnica – M5 (potez Dariva – Kozja čuprija)“ planiran je u Nacrtu Budžeta Grada Sarajevu za 2022. godinu u iznosu od 80.000 KM.

Ostali prijedlozi se ne prihvataju iz razloga što prihodovna strana Prijedloga Budžeta Grada Sarajeva za 2022. godinu u odnosu na Nacrt nije imala opravdan osnov za povećanje, što je razlog nemogućnosti finansiranja predloženih primjedbi.

4. Gradski muzeji Sarajevo

„S obzirom na prijedlog se u sklopu JU „Gradski Muzeji“ Sarajevo pridruži i „Sarajevski spomenar“ spomen soba ubijenoj djeci tokom opsade Sarajeva 1992.-1995., molimo Vas da u 2022. godini povećate predviđeni budžet JU „Gradski Muzeji“ Sarajevo za iznos od 9.000 KM, što su procijenjeni predviđeni troškovi za tekuće održavanje „Sarajevski spomenar“ spomen soba ubijenoj djeci tokom opsade Sarajeva 1992.-1995.“

Stav predlagača:

Primjedba se prihvata.

II OČITOVANJE GRADSKO SLUŽBE FINANSIJA NA NACRT BUDŽETA GRADA SARAJEVO ZA 2022. GODINU

1. Gradska služba finansija Grada Sarajeva je u toku javne rasprave izvršila detaljnu analizu Budžeta Grada Sarajeva za 2021. godinu na osnovu kojeg je sačinjen izvještaj o izvršenju budžeta za 11 mjeseci te je isti pokazao trend slabije realizacije kapitalnih transfera te uštede koje su vidljive na ugovorenim uslugama, kao i drugim pozicijama. Evidentno je da će se u 2021. godini ostvariti višak prihoda nad rashodima (suficit). Nakon pokrivanja deficita iz prethodnih godina, ostvareni suficit će iznositi oko 375.000 KM te je isti prikazan u Prijedlogu Budžeta Grada Sarajeva za 2022. godinu, a što je Ured za reviziju Federacije BiH kroz primjedbe sugerisao da se poštuju odredbe Zakona o budžetima u FBiH u dijelu koji se odnosi na planiranje pokrivanja suficita ili deficita, što nije bila praksa u prethodnom periodu. Suficit će se rasporediti na iste one kapitalne projekte koji nisu realizovani u 2021. godini i na osnovu kojih je isti nastao.

Raspored suficita po projektima:

| Ekon.kod | OPIS | Nacrt Budžeta Grada Sarajevo za 2022. godinu | Prijedlog Budžeta Grada Sarajevo za 2022. godinu |
|----------|---|--|--|
| 6151 | Zaštita, konzervacija , prezentacija i rehabilitacija Historijske građevine-Zgrada željezničke stanice Bistrik u Sarajevu | 0 | 25.000 |
| 6151 | Projekat hotel Vidikovac | 0 | 100.000 |
| 6151 | Projekat rekonstrukcije, restauracije i kolorističke obrade fasada u GS | 80.000 | 230.000 |
| 8216 | Projekat zatvaranja terase Olimpijskog bazena Otoka | 630.000 | 730.000 |

2. Prihodovna strana Prijedloga Budžeta Grada Sarajeva za 2022. godinu u odnosu na Nacrt nije imala opravdan osnov za povećanje, što je i osnovni razlog nemogućnosti finansiranja svih predloženih primjedbi. Prihvatanje određenih primjedbi i prijedloga od strane učesnika u javnoj raspravi na Nacrt Budžeta Grada Sarajeva za 2022. godinu u iznosu od 120.000 KM, Gradska služba finansija je bila primorana da umanjim određene pozicije. Uvažene su sugestije vijećnice Marijele Hašimbegović te su putni troškovi vraćeni na prošlogodišnji nivo. Također, uvažena je i sugestija gradske vijećnice Alme Čengić te su sredstva koja su namijenjena za primjenu Odluke o uslovima i postupku prihvatanja pokroviteljstva Grada Sarajeva umanjena za 20.000 KM u odnosu na Nacrt Budžeta Grada Sarajeva.

| Ekon.kod | OPIS | Prijedlog Budžeta Grada Sarajevo za 2022. godinu |
|----------|---|--|
| 6131 | Putni troškovi | 20.000 |
| 6143 | Primjena Odluke o finansiranju kulturnih manifestacija od interesa za Grad Sarajevo | 30.000 |
| 6143 | Primjena Odluke o uslovima i postupku prihvatanja pokroviteljstva Grada Sarajeva | 20.000 |
| 6144 | Iluminacija objekata u gradu Sarajevu | 50.000 |

3. Gradska služba finansija u Prijedlogu odluke o izvršavanju Budžeta Grada Sarajeva za 2022. godinu, u članu 2. Struktura budžeta dodaje se stav 7. koji glasi:

„Grad kao jedinica lokalne samouprave je jedan budžetski korisnik. Gradsko vijeće, Pravobranilaštvo Grada Sarajevo i ostale gradske službe su potrošačke jedinice koje imaju finansijske planove izdataka, ali se ne iskazuju pojedinačno u posebnom dijelu budžeta Grada.“

U Prijedlogu odluke o izvršavanju Budžeta Grada Sarajeva za 2022. godinu, u članu 26. Realizacija sredstava tekuće rezerve i nepredviđenih izdataka dodaje se stav 9. koji glasi:

„Za korištenje budžetske pozicije – Gradsko vijeće nepredviđeni izdaci, prijedlog daje Predsjedavajući Gradskog vijeća Grada Sarajevo.“

III IZVOD IZ STENOGRAMA SJEDNICE GRADSKOG VIJEĆA GRADA

Tačka 9.

Nacrt Budžeta Grada Sarajeva za 2022. godinu

Tačka 10.

Nacrt Odluke o izvršavanju Budžeta Grada Sarajeva za 2022. godinu

Tačka 11.

Informacija o izvršenju Budžeta Grada Sarajeva za period 01.01. - 30.09.2021. godine

Predsjedavajući Gradskog vijeća Grada Sarajeva Jasmin Ademović: Molim vas idemo dalje sa dnevnim redom. Prelazim na sljedeće tačke 9, 10. i 11. Predlažem, s obzirom da su tri materijala koja se tiču budžeta, izvršenja budžeta i Odluke o izvršenju Budžeta da, za ova tri materijala vodimo jedinstvenu raspravu a onda da odlučujemo pojedinačno. Da li se slažete s ovim prijedlogom? U svakom slučaju zamolio bi službe samo da nam daju, daju mogućnost glasanja o ovom proceduralnom prijedlogu, znači da se vodi jedinstvena rasprava za tačke 9, 10. i 11. a onda da pojedinačno odlučujemo. Molim vas da se pripremite za glasanje. Konstatujem da je Gradsko vijeće Grada Sarajeva sa 19 glasova „za“, nula „protiv“, nula „suzdržanih“, sedam vijećnika „nije glasalo“ usvojilo ovaj proceduralni prijedlog.

Predsjedavajući Gradskog vijeća Grada Sarajeva Jasmin Ademović: Vijećnik Vukadin se javio. Izvolite.

Gradski vijećnik Toni Vukadin: Hvala predsjedavajući. Budući da je već pola dva, evo ja bih ispred Kluba zamolio pauzu nekih 45 minuta.

Predsjedavajući Gradskog vijeća Grada Sarajeva Jasmin Ademović: Pauza 45 minuta za ručak. Molimo u dva i petnaest svi nazad u salu. Hvala lijepo.

PAUZA

Predsjedavajući Gradskog vijeća Grada Sarajeva Jasmin Ademović: Dobro. Molim sve da zauzmu svoje pozicije kako bi mogli nastaviti sa radom. Za 20 sekundi nastavljamo. Molim vas pozovite vijećnike koji su ispred sale da uđu u salu kako bi nastavili sa radom. Nastavljamo sa radom. Molim vas da zauzmete svoje pozicije. U sali je 17 vijećnika, tako da imamo kvorum za rad. Vjerujem da će nam se u skorije vrijeme pridružiti i ostatak vijećnika koji su već bili prisutni na sjednici. Stali smo kod tačaka 9, 10 i 11. To jeste, izglasali smo da ćemo voditi jedinstvenu raspravu za ove tri tačke, a koje se tiču:

- Nacrta Budžeta,
- Nacrta Odluke o izvršavanju Budžeta Grada Sarajeva za 2022. godinu te
- Informacije o izvršenju Budžeta Grada Sarajeva za period 01.01. – 30.09.2021. godine.

Podsjećam vas da je predlagač ovih akata gradonačelnica. Da su materijale razmatrala i nadležna radna tijela i to Odbor za budžet i finansije, Administrativna komisija te Komisija za Statut i akte. Izvještaji radnih tijela su vam dostupni u materijalima. U povodu razmatranja Nacrta Budžeta Grada Sarajeva za 2022. godinu, Odbor za budžet i finansije je donio određene zaključke i naravno te zaključke imate u materijalima. Sada bih zamolio za uvodno izlaganje. Gradonačelnica Karić. Izvolite. Znači, molim vas samo da uzmete u obzir da trebamo uvodno izlaganje za sve tri tačke. Možete jednu, drugu pa treću, svakako su sve vrlo slična tema. Izvolite gradonačelnice Karić.

Gradonačelnica Grada Sarajeva Benjamina Karić: Zahvaljujem se uvaženi predsjedavajući. Ja ću dati uvodna izlaganja za sve tri tačke koje su objedinjene. Napominjem, svakako, da sve ono što možda zahtjeva stručniju analizu od ovoga što ja vama kažem, da je tu sa nama danas pomoćnik gradonačelnice za finansije gospodin Muamer Kutlovac i da je spreman odgovoriti na sva pitanja koja su, opet ponavljam, možda dublja i stručnije komplikovanija od ovoga što ću vam ja sada izložiti. Nacrt Budžeta Grada Sarajeva za 2022. godinu sadrži sve elemente koji su propisani članom 26. Zakona o budžetima Federacije Bosne i Hercegovine a to su:

1. detaljan prikaz svih javnih prihoda i primitaka
2. rashode i izdatke iskazane po projektima i izvorima finansiranja

Kao obavezan elemenat utvrđena je i visina tekuće rezerve, a koja ne prelazi 3% budžetskih prihoda bez primitaka kako to i sam Zakon nalaže. Uz Nacrt Budžeta je kao obaveza priloženo Obrazloženje Budžeta koje sadrži:

1. makroekonomske pokazatelje,
2. podatke o svim prihodima i rashodima prethodne fiskalne godine
3. izvještaj o izvršenju budžeta u prvom polugodištu tekuće fiskalne godine,
4. podatke o unutrašnjem dugu Grada Sarajeva, te
5. podatke o kapitalnim izdacima

U skladu sa projiciranim prihodima i u skladu sa Zakonom o budžetima Federacije Bosne i Hercegovine, uravnotežena je prihodovna i rashodovna strana. Naime, predloženi nacrt je ispoštovao odredbe član 43. Zakona o budžetima Federacije Bosne i Hercegovine koji nalaže da tekući bilans Budžeta mora biti pozitivan ili jednak nuli. Ispunjenjem ovih uslova o kojima sam govorila, Nacrt Budžeta Grada Sarajeva za 2022. godinu dobio je pozitivno Mišljenje Kantonalnog ministarstva finansija. Kada govorimo o Odluci o izvršenju Budžeta Grada Sarajeva za 2022. godinu, pravni osnov za donošenje ove odluke sadržan je u članu 7. stavu 1. i 2. Zakona o budžetima u Federaciji Bosne i Hercegovine koji propisuje da, između ostalog, gradska vijeća pored Budžeta donose i odluke o izvršavanju budžeta. Ovom odlukom uređuje se struktura prihoda i primitaka te rashoda i izdataka Budžeta Grada Sarajeva za 2022. godinu, način izvršavanja, obim zaduživanja, prava i obaveza korisnika budžetskih sredstava, ovlaštenja izvršne vlasti u izvršavanju budžeta za tekući godinu, potom kazne za neispunjenje obaveza te druga pitanja vezana uz izvršavanje budžeta, kao i članu 28. citiranog Zakona kojim se određuje shodna primjena Zakona, tačnije

odredba članova od 3. do 27. Zakona, Zakona o budžetima. Pravni osnov je sadržan i u članu 26. stav 1. tačka 2. i 6. Statuta Grada Sarajeva kojim je propisano da Gradsko vijeće donosi odluke i druge propise i opće akte i daje njihovo tumačenje i, između ostalog, donosi budžet. Isto tako, s obzirom da postojeći gradski propis u dijelu koji se mijenja treba prilagoditi stvarnim potrebama, pristupilo se dopuni propisa uz primjenu osnovnog nomotehničkog principa da se dopune vrše u odnosu na osnovni tekst propisa i to propisom iste važnosti i u istom postupku kao i propis koji se mijenja. Pored gore navedenog, odlukom se utvrđuje obaveza Službe finansija za planiranje novčanih tokova, kao i obaveza da na osnovu tromjesečnih finansijskih planova koje dostavljaju službe sačinjava operativne planove izvršenja budžeta koje utvrđujem ja. Također se utvrđuju prioriteta plaćanja. To jeste dinamika izvršavanja budžeta te način trošenja sredstava budžetske rezerve. Primjena ovog Zakona rezultirat će transparentnosti izvršenje Budžeta Grada Sarajeva za 2022. godinu. Dozvolite mi da vam dam informaciju o izvršenju Budžeta Grada Sarajeva za period od 01.01. do 30.09.2021. godine. Iznos usvojenog Budžeta je 15.674.499,00 KM. U toku devet mjeseci Budžet se izvršavao na osnovu Zakona o budžetu Federacije Bosne i Hercegovine i Odluke o izvršavanju Budžeta Grada Sarajeva za 2021. godinu. Ostvarena sredstva za izvještajni period su 10.199.191,12 KM, a rashodi i izdaci za isti period su 9.216.043,10 KM. Kada govorimo o prihodima Budžet Grada Sarajeva za 2021. godinu u okviru prihoda i primitaka ostvaren je za devet mjeseci u iznosu od 10.199.191,12 KM ili možemo reći 65,07% od plana. Prihodi i primici su prikazani i tabelarno i nalaze se u vašim materijalima. Da li ima pitanja?

Predsjedavajući Gradskog vijeća Grada Sarajeva Jasmin Ademović: Zahvaljujem gradonačelnici Karić. Sada će vjerujem kolega Kutlovac, pomoćnik gradonačelnice za finansije. Evo ako može samo još malo detaljnije izlaganje. Znači, Nacrt Budžeta Grada Sarajeva za 2022. godinu, Nacrt Odluke o izvršavanju Budžeta te Informacija o izvršenju Budžeta Grada Sarajeva za 01.01.-30.09. Izvolite gospodine Kutlovac.

Pomoćnik gradonačelnice za finansije Muamer Kutlovac: Uvaženi Predsjedavajući, uvažena gradonačelnice, dopredsjedavajući, zamjenici gradonačelnice, gradski vijećnici, sve vas srdačno pozdravljam. Naime, gradonačelnica je u kratkim crtama izložila Budžet, a ja mogu da vam dočaram budžet, odnosno strukturu samog budžeta kroz matematičke iskaze i kroz samu analizu budžeta koju sam napravio. Naime, prihodovna strana Nacrta Budžeta Grada Sarajeva za 2022. godinu iznosi 20.905.673,00 KM te je planirana na osnovu revidiranih projekcija javnih prihoda za 2021. godinu i projekcija za period 2022.-2024. godina, koje smo dobili od Federalnog ministarstva finansija. Naime, prihodi od poreza na promet nepokretnosti i prava planirani su u iznosu od 8.000.000,00 KM, što je u odnosu na 2021. godinu manje za 8,73%. Evidentan je pad ovih prihoda od poreza i njegovo ostvarenje u 2021. godini te se neće ostvariti u onom planiranom iznosu kakvog smo ga planirali u Budžetu za 2021. godinu te je tu i glavni razlog zašto smo ove prihode u Nacrtu Budžeta smanjili na osam miliona. Prihodi od indirektnih poreza planirani su u iznosu od 7.721.596,00 KM i u odnosu na 2021. godinu prihodi od indirektnih poreza su veći za 27,08%, što predstavlja značajan porast i sam epit na porast ukupnih prihoda i samog Budžeta Grada Sarajeva za 2022. godinu. Ukupni prihodi u Budžetu Grada Sarajeva za 2022. godinu, ne uzimajući primitke odnosno kredit Razvojne banke koji smo prikazali u Budžetu za 2022. godinu, je veći za 4,66% u odnosu na Budžet Grada Sarajeva za 2021. godinu. Učešće ovih prihoda koje sam spomenuo, oni su u isto vrijeme i najbitniji prihodi koje ostvaruje Grad Sarajevo u iznosu od 95,84%. Ako ovim prihodima dodamo transfere koji iznose 2,74%, a koje Gradu Sarajevu doznače drugi nivoi vlasti za realizaciju različitih projekata, možemo reći da Grad Sarajevo sa ostvarenim vlastitim prihodima učestvuje svega 1,42% i što u budućnosti treba sredstva usmjeriti u kapitalne projekte koji će doprinijeti promjeni trenutne strukture prihoda i omogućiti Gradu da oprihoduje veći iznos vlastitih prihoda koji može uložiti u druge kapitalne projekte od značaja za Grad. Pored ovih prihoda koje sam spomenuo, u Budžetu Grada Sarajeva za 2022. godinu prikazani su i transferi u iznosu od 450.000,00 koji će biti uplaćeni na depozitni račun Grada Sarajeva od drugih nivoa vlasti po različitim projektima. Zatim, prihodi od imovine u ukupnom iznosu 93.000,00 KM i prihodi od naknade taksi pružanje javnih usluga i novčanih kazni u ukupnom iznosu od 140.000,00 KM. Kao što sam maloprije spomenuo u odnosu na Budžet Grada Sarajevo za 2021. godinu, u Nacrtu Budžeta Grada Sarajevo za 2022. godinu su uvršteni primici od kreditnog zaduženja kod Razvojne banke u iznosu od 4.501.077,00 KM, što se i manifestovalo na ukupan porast ili povećanje Budžeta od

33,37%. Razlog njihovog uvrštavanja u Budžet, odnosno u Nacrt Budžeta Grada Sarajeva za 2022. godinu, jeste što isti neće biti potrošeni ili utrošeni u 2021. godinu te su razvrstani po projektima i po namjenama kako su i uzeti od Razvojne banke. Tabela prikaz, mogu u kratkim crtama samo preći projekte koji se finansiraju ove godine u Budžetu, znači za 2022. godinu iz kreditnih sredstava. To su kasarna Jajce u iznosu od 50.000,00 KM. Projektovanje i izgradnja biciklističke staze, pardon, biciklističke staze 30.000,00 KM. Pjeskarenje zidova korita Miljacke 30.000,00 KM. Rekonstrukcija Ramića potoka 40.000,00. Rekonstrukcija Bistričkog potoka 40.000,00. Projekat izrade kanalizacionog sistema za potrebe Gornje stanice 986.077,00 KM. Rekonstrukcija i adaptacija objekta bivše zgrade SDK-a kod Vječne vatre 2.605.000,00. Rekonstrukcija parka FIS 20.000,00. Projekat zatvaranje terase Olimpijskog bazena Otoka 630.000,00. Projekat objekta ugostiteljskog-turističkog sadržaja i vanjskog uređenja na lokaciji Čolina kapa 20.000,00. I iluminacija objekata u gradu Sarajevu 50.000,00. Ovo bi bilo u kratkim crtama po pitanju prihodovne strane Nacrta Budžeta Grada Sarajeva za 2022. godinu. Sada prelazim na rashode i izdatke. Nacrtom Budžeta Grada Sarajeva za 2022. godinu ukupno predložena sredstva su raspoređena na rashode i izdatke po namjenama u iznosu od 20.905.673,00 KM, a što se može vidjeti u posebnoj dijelu Budžeta koji ste imali u prilogu materijala. Plaće i naknade troškova zaposlenih, doprinosi, te, su, i plaće su planirane na osnovu važećih propisa prema postojećoj strukturi zaposlenih u Gradu Sarajevu. Naime, planirani nivo sredstava za bruto plaće iznosi 3.205.000,00. Naknade troškova zaposlenih planirane su u iznosu od 381.026,00 KM. Doprinosi poslodavca u ukupnom iznosu od 350.000,00 KM, te su obračunati u skladu sa zakonskim propisima. Ove tri stavke zbirno iznose 3.936.026,00 što je ukupno 24,67% ukupnih rashoda Nacrta Budžeta Grada Sarajeva za 2022. godinu. Što se tiče izdataka za materijal, sitan inventar i usluge planiran je u ukupnom iznosu od 2.785.700,00 KM što predstavlja povećanje u odnosu na 2021. godinu od, u iznosu od 11,26%. U okviru ovih troškova su putni troškovi, izdaci za energiju, izdaci za komunalne usluge, izdaci za materijal, izdaci za usluge prijevoza i goriva, unajmljivanje imovine i opreme, izdaci za tekuće održavanje, izdaci za osiguranje i bankarske usluge, te izdaci za ugovorene usluge. Možemo konstatovati da je na većini spomenutih pozicija i izdataka napravljena ušteda te da su izdaci planirani na osnovu izvršenja Budžeta za 2021. godinu na osnovi izvršenja koji smo imali za deset mjeseci, te smo napravili projekciju koje bi to moglo biti izvršenje još naredna dva mjeseca. Osim razlog, želim još ovo da spomenem. Evidentan je porast izdvojenih sredstava na izdacima koji se odnose na tekuće održavanje. Tu je porast od dvadeset posto, 20,60%. A razlog je što Gradska uprava trenutno održava tri zgrade, te shodno tome su i izdaci za održavanje porasli. Izdaci osiguranja bankarskih usluga i usluga platnog prometa su također veći u odnosu na 2021. godinu a razlog je što je na ovoj poziciji planirana su sredstva za prenamjenu kredita koja je izvjesno da će se desiti u 2022. godini. Na poziciji 613900 ugovorene i druge posebne usluge evidentan je porast od 18,81% što je osnovni razlog i povećanje sveukupnih izdataka za materijal i usluge. Povećanje izdataka na Ugovorenim uslugama je što se određeni izdaci ove godine planirani na poziciji Ugovorene usluge dok su ranijih godina prikazivani na drugim kontima što nije bilo u skladu sa kontnim planom Federacije BiH. Ukupni izdaci za materijal i sitan inventar i njihove učešće u ukupnim rashodima Budžeta Grada Sarajeva iznosi 16,52%. Prelazim na tekuće transfere. Tekući transferi su planirani prioritetni i u skladu sa zakonskim obavezama i realnim mogućnostima Nacrta Budžeta Grada Sarajeva za 2022. godinu. Iznose 6.311.400,00 KM. U odnosu na 2021. godinu tekući transferi su uvećani za 3,09% a najveći iznos tekućih transfera koji iznosi 30,10% odnose se na subvencije javnim preduzećima i to

- JP „Olimpijski bazen“ – 1.500.000,00 KM, i
- JU „Gradski muzeji Sarajevo“ – 400.000,00 KM.

Tekući grantovi Drugim nivoima su planirani u iznosu od 400.000,00 KM. Ja ću samo kada budem obrazlagao Tekuće transfere samo neke spomenuti. One koji su u najvećim iznosu a sve detaljnije imate u materijalu koji sam poslao. Tekući grantovi drugim nivoima su planirani kao što sam rekao u iznosu od 400.000,00 KM. Održavanje vodotoka, uređenje i održavanje i zaštita uređenih vodotoka na području grada Sarajeva je 100.000,00 KM. Finansijska podrška ustanovama kulture BiH, sedam institucija kulture od značaja za Bosnu i Hercegovinu 70.000,00 KM te sufinansiranje projekata iz oblasti obrazovanja u osnovnim i srednjim školama 30.000,00 KM. 614200 ili Tekući grantovi pojedincima su planirani u iznosu od 452.400,00 KM a najznačajnija izdvajanja na ovoj stavci su izdvajanja za stipendije djece iz socijalno ugroženih porodica u iznosu od 300.000,00 KM.

Predsjedavajući Gradskog vijeća Grada Sarajeva Jasmin Ademović: Izvinite kolega Kutlovac, ne bi da vas prekidam znam da ste se zaista detaljno spremili, samo ove druge dvije odluke možete izložiti dosta kraće. Znači,

Pomoćnik gradonačelnice za finansije Muamer Kutlovac: Dobro. Evo ja ću onda.

Predsjedavajući Gradskog vijeća Grada Sarajeva Jasmin Ademović: U uvodnom izlaganju, s obzirom da nam je Nacrt Odluke u pitanju, bit će prostora u javnoj raspravi i naravno Informacija o izvršenju Budžeta ...

Pomoćnik gradonačelnice za finansije Muamer Kutlovac:... same Odluke o izvršavanju Budžeta neće ovaj ni doticati, jer je ona naslonjena na...

Predsjedavajući Gradskog vijeća Grada Sarajeva Jasmin Ademović: Tako je, tako je.

Pomoćnik gradonačelnice za finansije Muamer Kutlovac: Na Zakon o Budžetima. Ja ću sada onda samo još u kratkim crtama o kapitalnim transferima reći nešto i završiti ovo svoje izlaganje.

Predsjedavajući Gradskog vijeća Grada Sarajeva Jasmin Ademović: Hvala.

Pomoćnik gradonačelnice za finansije Muamer Kutlovac: Znači, Tekuće transfere ćemo preskočiti njihovo detaljno izlaganje. Prelazim na Kapitalne transfere. Predložena sredstva na budžetskoj stavci Kapitalni izdaci planirani su u iznosu od 6.630.547,00 KM. Pozicije na kojima su planirana neću sada izlagati, već samo ću reći da u ukupnim rashodima Budžeta Grada Sarajeva kapitalni transferi iznose 31,72% rashoda ukupnih. Također je bitno spomenuti da se u iznosu od 1.959.470,00 KM, odnosno 12,28% od ukupnih izdataka koji su izdvojeni za kapitalne transfere finansira iz budžetskih sredstava što je mogu reći velik iznos za ovako skroman budžet. Samo još u Nacrtu Budžeta smo, također, planirali plaćanje kamata za domaće pozajmljivanje kao i otplatu glavnice kredita u iznosu od 910 hiljada, odnosno 232 hiljade sa ukupnim izdvajanjima od 1.142.000,00 što je otprilike 7% ukupnih rashoda Budžeta. Ja ću onda sa ovim završiti svoje izlaganje. Ja se izvinjavam ako sam bio previše opširan.

Predsjedavajući Gradskog vijeća Grada Sarajeva Jasmin Ademović: Hvala. Niste. Hvala vam puno. Hvala kolegi Kutlovcu.

Pomoćnik gradonačelnice za finansije Muamer Kutlovac: Ako ima nekih dodatnih pitanja kolegi i službi stojimo na raspolaganju.

Predsjedavajući Gradskog vijeća Grada Sarajeva Jasmin Ademović: Hvala. Hvala puno. Otvaram sada diskusiju. Evo za riječ se javila prva vijećnica Lazarević. Izvolite. Imate riječ.

Gradska vijećnica Biljana Lazarević: Hvala Predsjedavajući. Srdačan pozdrav svima u sali. Evo pažljivo sam slušala izlaganje gospodina Kutlovca. Ono što je on primijetio, a to je praktično mislim i u svim općinskim vijećima ista stvar, da porez na imovinu je praktično u opadajućem slučaju i ja se bojim da, da nam je ovdje Federacija malo ovaj zakazala s ovim. Bojim se da će nam ovo opadati i dalje. Ono što mene konkretno zanima su ovi prihodi od iznajmljivanja poslovnih prostora koji su u planu, u Nacrtu Budžeta 12.000,00 a trenutna realizacija istog je u iznosu od 4,38%. Da li u narednom periodu odnosno kroz Rebalans Budžeta možemo očekivati da ovi prihodi budu veći za eventualno iznajmljivanje Vidikovca ili Bistričke stanice. Dalje, pitanje. Vidim da je povećano na poziciji 614300 podrška projektima dobrovoljnih vatrogasnih društava na području gradskih općina. Moje pitanje se odnosi da li imamo sada odmah informaciju koja su vatrogasna društva planirana i šta je kriterij za dodjelu. Još jedno pitanje se odnosi na Sindikalni odbor. Vidim da je kroz Nacrt Budžeta za Sindikalni odbor Gradske uprave planirano 5.000,00

KM. Zanima me šta je kriterij za dodjelu sredstava odnosno šta time finansira Sindikalna organizacija, za koje aktivnosti. Imam samo nešto što bi voljela da uđe kao doprinos javnoj raspravi u Nacrt Budžeta. Spomenut ću samo tri stavke koje su meni jako značajne i što bih pohvalila a to je prvo podrška projektima Javne ustanove Zavod za zbrinjavanje mentalno invalidne djece i omladine Pazarić koji u prošloj godini Budžeta, u Nacrtu ni u Budžetu nije bio, ove godine planiran iznos 20.000,00. Ja vjerujem da ste kod izrade Nacrta Budžeta i planiranje ovoga iznosa uzeli maksimalno što je moguće al se nadam da će biti mogućnosti za eventualno povećanje iznosa za to. Sljedeće je nabavka knjižnog fonda za Javnu ustanovu Biblioteka Sarajeva. Vidjela sam da u Budžetu 2021. taj iznos je bio 10.000,00 maraka sada tog iznosa nema. Nadam se da ćemo naći neki način da bi se ovo finansiralo. I također, sam primijetila de je u prošloj godini odnosno u Budžetu prošle godine bilo finansiranje za Osnovnu školu Hamdija Kreševljaković za fiskulturnu salu. Ove godine nemamo ni jednu osnovnu školu sa područja grada Sarajeva u ovoj, u ovom nacrtu. Mi smo imali jedan prijedlog kao Klub i mislim da će to vrijediti svima. Jedina škola na području općine Centar koja trenutno nema završenu kotlovnice je Osnovna škola Mehmed beg Kapetanović Ljubušak. U Budžetu Općine Centar su predviđena sredstva i bilo bi lijepo da i Grad djelimično finansira taj dio. Hvala vam lijepo. A evo molila bih odgovore na ova prva tri pitanja od gospodina Kutlovca. Hvala.

Predsjedavajući Gradskog vijeća Grada Sarajeva Jasmin Ademović: Zahvaljujem vijećnici Lazarević. Mislim da je, da bi možda lakše bilo da svi postavite pitanja pa da vi na kraju odgovorite.

Pomoćnik gradonačelnice za finansije Muamer Kutlovac: *(ne čuje se, nije uključen mikrofon)*

Predsjedavajući Gradskog vijeća Grada Sarajeva Jasmin Ademović: Dogovoreno. Evo pokušajte vi u toku diskusije. Izvolite Gradonačelnice.

Gradonačelnica Grada Sarajeva Benamina Karić: Hvala lijepo Predsjedavajući. Zahvaljujem se uvaženom pomoćniku Kutlovcu na sjajnom obrazlaganju Budžeta. Zaista mogu reći da je Budžet transparentan, da je detaljan, da je detaljno urađen, da smo se zaista trudili da u saradnji sa svim službama u Gradskoj upravi napravimo jedan Budžet koji će biti na čast i na ponos i Gradskoj upravi i Gradskom vijeću i da će zaista koristiti dobro i na dobro svim našim sugrađanima. Zahvaljujem se uvaženoj vijećnici gospođi Lazarević na postavljenim pitanjima. Ja imam jedan prijedlog i ako ste saglasni da odgovore na pitanja dostavimo u pisanoj formi jer zaista za odgovore treba određena priprema. Mislim da Budžet ima poprilično puno stavki i da je nezgodno na sama pitanja odgovoriti odmah u istom trenutku. Ali mislim da možemo u najkraćem vremenskom periodu i prije održavanja javne rasprave svakako dostaviti odgovore na sva pitanja koja su, koja su recimo sada postavljena. Tako je. I svakako onda ide javna rasprava, gdje mi očekujemo od svih gradskih vijećnika kvalitetan, kvalitetan doprinos u toku same javne rasprave. Hvala.

Predsjedavajući Gradskog vijeća Grada Sarajeva Jasmin Ademović: Zahvaljujem Gradonačelnici. Slažem se s prijedlogom. To jeste, evo sve što bude kolega Kutlovac mogao odgovoriti na samoj sjednici on će odgovoriti. Za one stavke koje možda mu treba malo više ovaj odgovorit će u pisanoj formi. Idemo dalje sa diskusijom. Za riječ se javila vijećnica Šahat. Izvolite imate riječ.

Gradska vijećnica Danijala Šahat: Zahvaljujem Predsjedavajući. Zahvaljujem se ovom prilikom i gospodinu Kutlovcu na jako iscrpnom ovaj obrazloženju Nacrta Budžeta. Ja ću se samo dotaći stavke, razumijem da je ovo nacrt i da će se dati doraditi kroz javnu raspravu, gdje ćemo mi kao Klub Naroda i Pravde imati ovaj dosta prijedloga. Mogu vidjeti da je, da su stavke za 2022. godinu dosta preslikane u odnosu na ovaj ovogodišnji budžet. I može se vidjeti da se ulaže u samo jednu općinu s tim da Grad čine četiri općine. Ja ću se dotaći Općine Novo Sarajevo jer dolazim iz te općine i ni u jednom Budžetu u prethodne četiri godine nije se ulagalo u ostale općine. Recimo u Novom Sarajevu mi imamo Projekat Sportsko-rekreativni centar Vinko Šamarlić i Par šume Hum. Projekat koji je jako vrijedan i koji je vrijedan ne samo za općinu Novo Sarajevo već za cijeli Kanton i za sve druge općine.

Planirano je da bude kao sportsko-rekreativni centar kao nešto poput Safeta Zajke koji će biti povezan sa Parkom šumama Hum. Općina Novo Sarajevo radi na izgradnji tog projekat, ulaže svoje budžete. Smatram da će Gradonačelnica imati sluha i da će u Nacrt Budžet odnosno Prijedlog Budžeta ubaciti određena sredstva koja će nam pomoći u realizaciji istog. Smatram da ima dosta projekata ovdje koji su ubačeni kao što je ljetovanje školske djece Dječiji dom Bjelave od 20.000,00 maraka. Obilježavanje godišnjice ZOI '84 5.000,00 maraka. S tim što ima još udruženje koje bi ja spomenula, to je udruženje „Porodice 3 plus“ koje ću kroz javnu raspravu dati kao prijedlog, smatram da to udruženje trebamo podržati jer natalitet u našoj državi jako opada i svi vrlo dobro znamo koji smo roditelji koliko sredstava je potrebno da bi se djeca školovala i da bi se djeca ovaj edukovala i što se tiče i sportskih i kulturnih manifestacija. Mogu samo da spomenem vezano za finansiranje Projekta opremanje kuhinje Javne ustanove Centar za odgoj i obrazovanje i rehabilitaciju Vladimir Nazor. Ovdje me interesuje zbog čega je smanjen na 5.000,00 iako je u Budžetu bilo predviđeno za 2021. godinu 30.000,00. U Budžetu Općine Novo Sarajevo predviđena sredstva za ovu stavku su 50.000,00 i smatram da je projekcija odnosno projektovanje ovog projekta preko 140.000,00 maraka i ovih 5.000,00 mislim da ne bi bilo dovoljno. Interesuje me samo da li su uopće utrošena ova sredstva od 30.000,00 i zbog čega su smanjena. Mi ćemo kao Klub Naroda i Pravde djelovati u ovom pravcu da se ovaj iznos poveća jer smatramo da ovoj djeci u ovoj školi je jako neophodna ova kuhinja. Što se tiče ostalih prijedloga mi ćemo davati kroz javnu raspravu, htjela sam samo eto da se osvrnem vezano za Novo Sarajevo jer stvarno, evo čitala sam budžete prethodnih godina ni u jednoj, ja razumijem da je Stari Grad općina koja je jezgro jel našeg grada, ali postoje projekti koji se mogu raditi i u ostalim općina jer Grad čine četiri općine i svi prihodi iz općina ostalih ulažu se u Grad Sarajevo. Tako da sve ostale prijedloge ćemo dostaviti kroz javnu raspravu. Ovaj. Hvala.

Predsjedavajući Gradskog vijeća Grada Sarajeva Jasmin Ademović: Zahvaljujem vijećnici Šahat. Sljedeći za riječ se javio kolega Srđan Srdić. Izvolite. Imate riječ.

Gradski vijećnik Srđan Srdić: Hvala Predsjedavajući. Ja ću kratko. Sve ostale prijedloge ću svakako u toku javne rasprave. Čitajući ovaj prijedlog Nacrta, pa ustanovio sam da, to i svi mi već znamo da u našim je li sarajevskim nogometnim klubovima trenutno ima jedna velika kriza, pa vidim da su stavke za Želju i Sarajevo izdvojene po 50.000,00 maraka, pa eto ja ... da se prilikom izrade Prijedloga Budžeta povećaju ove stavke na iznos od 100.000,00 maraka. Mislim da ćemo na taj način makar malo „pogurati“ naše sarajevske klubove da ne doživimo fujasko i krizu. I molim da taj moj prijedlog uđe kao prilog u javnu raspravu. Samo bi još postavi dva pitanja kratka kolegi Kutlovcu. Odakle u Nacrtu Budžeta 240.000,00 KM za KJKP Park kad već općine gradske u svojim budžetima izdvajaju određene iznose. Ja se ne sjećam da je Grad Sarajevo nekad prije izdvajao taj novac. I odakle 35.000,00 čak da se izdvaja za TV Sarajevo. Mislim da je to mnogo novca za prenošenje naših sjednica. Hvala.

Predsjedavajući Gradskog vijeća Grada Sarajeva Jasmin Ademović: Zahvaljujem vijećniku Srdiću. Sljedeća za riječ se javila vijećnica Hašimbegović. Izvolite.

Gradska vijećnica Marijela Hašimbegović: Zahvaljujem se Predsjedavajućem. I naravno zahvaljujem se uvaženoj Gradonačelnici i gospodinu Kutlovcu na njegovom stručnom izlaganju. Ova tema je trebala da bude sastavni dio rada Gradskog vijeća ja mislim na oktobarskoj sjednici onako kako je Program rada Gradskog vijeća zahtjeva, međutim mi evo danas imamo Nacrt Budžeta Grada Sarajeva za 2020. godinu. I s tim u vezi smo na neki način ograničili i vrijeme trajanja javne rasprave koja je po Zakonu o budžetima Federacije Bosne i Hercegovine određena. Na ovaj način smo ograničili i svoj način djelovanja odnosno vrijeme na koje možemo dati kvalitetne prijedloge kako bi se još unaprijedio, još bolje unaprijedio ovaj dokument. Dakle, moja pitanja će biti sljedeća. Zašto se u posebnom dijelu Grad Sarajevo tretirao kao potrošačka jedinica ekvivalentno sa ministarstvima i javnim preduzećima itd., jer Grad Sarajevo je naprosto Grad i ne spada u ovu jedinicu. Kod doprinosa za zaposlene postoje određene nejasnoće. Dakle, događa se da se kod smanjenja naknade troškova

zaposlenih sa 490.000,00 na iznos od 381.026,00. Obzirom da su bruto plaće za zaposlene ostale u istom iznosu kao 2021. godine koje iznose 3.205.000,00. Povećani su i putni troškovi sa 70 na 90 hiljada, a mislim da nam je svima nekako smjernica bila da idemo u pravcu racionalizacije i ušteda. Što se tiče ugovorenih usluga, mislim da ste odgovorili na činjenicu da se desilo značajno uvećanje sa 1.901.525 na 2.259.200 i hvala vam za taj odgovor. Također, iznos stručnih usluga je povećan gdje je naznačena i eksterna revizija koju smo već spominjali na našim sjednicama. I zanima me koji je iznos planiran za ovu eksternu reviziju jer ovo je ujedno bilo i moje vijećničko pitanje na koje evo još nisam dobila odgovor. Protokolarni budžet je isto tako povećan. Zanima me prijevod monografije koja se navodi. O kojoj monografiji se radi? Da li će ona biti štampana ili se radi samo o prijevodu monografiju? I na kraju ono što je meni možda u ovom trenutku najvažnije. Na moju inicijativu ovo Vijeće je usvojilo inicijativu koja se tiče obnove fasade Narodnog pozorišta. Ja sam dobila odgovor od stručne službe da će ova tema ući u sastavni dio Budžeta Grada Sarajeva za 2022. godinu. Ja nisam vidjela dakle, ovu, ovu stavku pa vas molim, naravno ja ću iskoristiti i dakle, period javne rasprave da vratimo ovu stavku na Nacrt Budžeta odnosno za Prijedlog Budžeta Grada Sarajeva 2022. godine. Evo ja vas molim za ove odgovore već kako ste se dogovorili kojim putem ćemo ih zaprimiti. Hvala lijepo.

Predsjedavajući Gradskog vijeća Grada Sarajeva Jasmin Ademović: Zahvaljujem vijećnici Hašimbegović. Vijećnica Čengiđ. Izvolite imate riječ.

Gradska vijećnica Alma Čengiđ: Zahvaljujem Predsjedavajući. Uvažena Gradonačelnice, dogradonačelnici i poštovane kolegice i kolege, dragi građani koji pratite rad današnje sjednice ja vas sve srdačno selamim i pozdravljam. Čitajući predloženi materijal, odnosno čitajući predloženi Nacrt Budžeta uočila sam neke nejasnoće koje ću naravno sada postaviti u vidu pitanja predlagaču. Naime, obzirom da se u dijelu Budžeta transferi Drugim nivoima vlasti i fondovima nalaze i transferi nekim javnim ustanovama zanima me zbog čega predlagač iste nije predvidio u korespondirajućoj tački Subvencije javnim preduzećima. Potom, obzirom da je došlo do umanjenja za 240.000,00 KM stavke Stipendiranja djece i socijalno ugroženih porodica a povećanje stavke primjene Odluke o pokroviteljstvu za 70.000,00 KM u odnosu na 2021. godinu zanimaju me razlozi za ove po meni nepotrebne izmjene. Zatim, obzirom da se u predviđena finansiranja za određene kantonalne ustanove poput Skenderije i TV SA, ustvari obzirom da su predviđena finansiranja zanima me razlog njihovog finansiranja. Napominjem da ukoliko se radi o kompenzaciji za pružanje usluga ista moraju biti predviđena u adekvatnom dijelu Budžeta uz adekvatan osnov propisan Zakonom o javnim nabavkama. I posljednje pitanje. Obzirom da su u nabavkama stalnih sredstava predviđena rekonstrukcije i adaptacije određenih građevina poput kasarne Jajce ili zgrade SDK-a a koje nisu u vlasništvu Grada Sarajeva a što je preduslov za evidentiranje stalnog sredstva zanima me zbog čega je to urađeno, te zbog čega se ista u obrazloženju ovog nacrta nalaze u kapitalnim transferima. Obzirom da je ovo Nacrt Budžeta klub kojem ja pripadam odnosno Klub Stranke demokratske akcije će svakako dostaviti svoje prijedloge u toku javne rasprave. Hvala vam.

Predsjedavajući Gradskog vijeća Grada Sarajeva Jasmin Ademović: Zahvaljujem vijećnici Čengiđ. Sljedeća za riječ se javila vijećnica Spahić. Izvolite. Imate riječ.

Gradska vijećnica Enisa Spahić: Zahvaljujem Predsjedavajući. Srdačno pozdravljam sve prisutne, uvaženu Gradonačelnicu, pomoćnike, kolege vijećnike, gledaoce ispred malih ekrana. Ja bih imala tri prijedloga vezano za tačku 9. na Nacrt Budžeta. Prvi prijedlog odnosi se na, i voljela bi da ti prijedlozi idu u javnu raspravu. Molim da se tekući transfer Udruženju „No Gluten“ na području Kantona Sarajevo planira u iznosu od 10.000,00 maraka za 2022. godinu. Celijakija je neizlječiva bolest i jedina bolest u ljudskoj patologiji koja se liječi dijetom i bezgluteinskom hranom, pa bi bezgluteinsku hranu trebali tretirati kao lijek, shodno tome i subvencionirati. Na inicijativu oboljelih i roditelja oboljele djece početkom 2017. godine osnovano je Udruženje oboljelih od celijakije „No Gluten“ Kantona Sarajevo. U momentu osnivanja brojalo je 27 članova. Danas broji 180 članova od

čega 50 djece različitog uzrasta. U 2021. godini transfer Grada Sarajeva iznosio je 5.000,00 maraka, što je potrošeno na kupovinu paketa bezgluteinske hrane članovima Udruženja. S obzirom da se kontinuirano povećava broj oboljelih, samim tim i broj članova Udruženja, dosadašnjim iznosom Udruženje neće moći nastaviti sa dobrom praksom podjele paketa. Stoga molim da se podrška Udruženju „No Gluten“ našim oboljelim sugrađanima za 2022. godinu poveća na iznos od 10.000,00 maraka. Drugi moj prijedlog se odnosi na Udruženje „Oaza“, Udruženje za podršku sa osobama sa intelektualnim teškoćama. Također da se iznos poveća na 10.000,00 maraka za 2022. godinu. Udruženje „Oaza“ kroz različite projekte i programe radi na unapređenju kvalitete života osoba sa intelektualnim teškoćama. Projekat „Jačanje kompetencija za život osoba sa intelektualnim teškoćama“ samo je jedan dio aktivnosti koji se sprovodi u dnevnom centru. Program i projekat pod nazivom „Moje pravo na sport“ sa sljedećim aktivnostima:

- trenažni proces tokom cijele godine,
- treninzi prilagođeni svim kategorijama,
- saradnja sa sportskim klubovima koji predstavljaju praktičan primjer inkluzije,
- redovni odlasci na međunarodna takmičenja.

Za sve navedeno Udruženju „OAZA“ su neophodna veća sredstva. Molim da se transfer za 2022. godinu poveća na iznos od 10.000,00 maraka. Treći prijedlog. Mi smo imali već neke informacije vezano za sufinansiranje Trga Barcelone u Općini Novi Grad, Olimpijsko selo. Obzirom na to da je Grad Sarajevo dobio podršku za zajednički nastup Barcelone i Sarajeva na Olimpijskim igrama 2030. godine, Općina Novi Grad u Budžetu za 2022. godinu planirala je 100.000,00 maraka što nije dovoljno za rekonstrukciju Trga. Iz tog razloga molim da i Grad Sarajevo učestvuje i planira sredstva shodno svojim finansijskim mogućnostima. Ja ću svakako ove prijedloge postaviti, poslati i u elektronskoj formi. Hvala.

Predsjedavajući Gradskog vijeća Grada Sarajeva Jasmin Ademović: Zahvaljujem vijećnici Spahić. U sklopu zaključaka koje ćemo poslije staviti na glasanje čisto da svi gradski vijećnici znaju, sve ono što ste vi danas iznijeli u diskusijama će ući kao prilog javnoj raspravi, tako da se ne trebate brinuti. Sljedeći za riječ se javio zamjenik Stevanović. Izvolite. Imate riječ.

Zamjenik predsjedavajućeg Gradskog vijeća Grada Sarajeva Dragan Stevanović: Hvala. Ja neću ... diskutovati u pojedinostima o Budžetu, niti o jednoj odluci jer mislim da to trenutno nije toliko bitno obzirom da ide javna rasprava i prijedlozi. Više ću vraćati, diskutovati u načelu znači. Ono što mislim da bi svi danas trebali da podržimo prvo jeste da se javna rasprava o Nacrtu Budžeta obavi zaista javno, transparentno i da mnogo više nego do sada u kreiranju Budžeta Grada Sarajeva kroz učešće o javnoj raspravi učestvuju i naše četiri općine koje bi onda rekao bi na neki način bile i sublimacija ove vaše diskusije koju ste govorili za Novi Grad, ovaj, jer mislim da je to izuzetno važno. Mi smo zbir četiri gradske općine i na neki način i izraz zajedničkih potreba te četiri gradske općine. Drugo, vrlo se zalažem za princip da svi transferi neprofitnim i nevladinim organizacijama idu putem javnog poziva. Ja lično sam obećao građanima kad sam dolazio u ovo Vijeće da ću nastojati da sve ono što treba da donesemo kao odluku ili gdje treba da dodijelimo sredstva bude najmaksimalnije transparentno. Naravno, neke od tih transfera i ne možemo regulisati javnim pozivima, ali mislim da većinu možemo. Time ćemo obezbijediti da finansiramo programe a ne udruženje kao udruženje, da ne dajemo novce za plaće nekih tamo službenika nego za stvarne i realne programe čiju realizaciju možemo pratiti. Napraviti ću jednu malu digresiju. Nedavno je u raspravi o Budžetu bilo priče gdje su novi za Muzej ratnog djetinjstva, aa onda mi neko kaže znate al' on kaže da mu direktor ima plaću ne znam ni ja za naše pojmove vrlo visoku. A onda mi treći kaže znate oni su to obezbijedili iz drugih sredstava. Mi moramo finansirati njihove programe. Molim vas dakle, iz tog proizlazi nešto što bih tražio kao preduslov ako se budemo odlučivali za javne pozive, a to je da imamo Registar nevladinih, neprofitnih organizacija i njihovih izvora finansiranja. Nije rijetka situacija da vi imate jednu istu organizaciju koja se finansira iz općine, iz Grada, iz Kantona, iz fondova itd., što je OK mislim ali želim da vidim u kojem iznosu, kako i želim ako ima profesionalnih zaposlenih da vidim kolika su primanja tamo. To, jer dajemo budžetske pare. Dalje, od ovog neću.

Naravno, još samo jedna mala napomena. Pripremajući se za ovu sjednicu ja sam imao poziva od raznih udruženja, građana itd, i kad sam stavio na papir otprilike je to iznosilo cirka negdje oko milion maraka. Dakle, svakom od vas ili od nas koji učestvujemo u kreiranju Budžeta ja vas molim kad onako bombastično iznesete ovdje ja bi za ovoga ili onoga milion, sto hiljada, pedeset hiljada da kažete od koga bi i uzeli jer u nacrtu i po svemu para ima onoliko koliko ima. Ili odakle bi ste namakli na prihodovnoj strani te novce odnosno odakle bi namakli, jer sve ovo ostalo što mi ovdje radimo a u upotrijebit ću sad od mog druga ovaj koji me često kritikuje u ovom Vijeću izraz i vrlo populistički. Znači i ja sad mogu reći ja hoću za Oazu, za Narodno pozoriše, za ne znam ni ja Univerzitetsku biblioteku da se u Budžetu planira 500.000,00. Krasno, al od čega, od kojih novaca. Od kojih i kome uzeti. Jer ako hoćemo da budemo korektni mi možemo se odlučiti ovdje šta su prioriteti al moramo reći od ovoga ćemo uzeti da bi smo ovome dali jer para ima toliko koliko ima, bar ja tako radim u svojoj kući i mislim da je primjereno da radimo i u ovoj našoj zajedničkoj kući. Dopustite mi još pošto vodimo zajedničku raspravu da samo jednu rečenicu ili dvije kažemo o Informaciji o izvršenju Budžeta. Prilika je to zbog toga što je danas 01. decembar i vjerovatno će se vrlo brzo morati donijeti odluke o utrošku sredstava koja su na stavci Centralna proslava dočeka Nove godine na otvorenom prostoru gdje je planirano nekih 50.000,00 maraka uz sredstva iz Budžeta Grada u sredstva iz drugih izvora, negdje oko 300.000,00. Uvažavajući činjenicu iz gradova glavnih iz okruženja, uvažavajući činjenicu i saopštenja o epidemiološkoj situaciji i u okruženju i kod nas ja mislim da mi kao odgovorno Vijeće danas možemo, moramo otvoriti prostor da zadužimo Gradonačelnicu da u dogovoru sa suorganizatorima, znači Kantom, općinama i Turističkom zajednicom donesemo zajednički stav da ova proslava na otvorenom na ovakav način u ovom momentu nije primjerena, te da ćemo planirana sredstva ovaj usmjeriti u druge korisne svrhe. I to predlažem kao neku vrstu zaključka.

Predsjedavajući Gradskog vijeća Grada Sarajeva Jasmin Ademović: Zahvaljujem kolegi, zamjeniku Stevanoviću. Evo do kraja diskusije ako može samo da kolega Stevanović formuliše zaključak kako bi ga mogli staviti na glasanje, a u sklopu odluke, to jeste Informacije o izvršenju Budžeta Grada Sarajeva za period 01.01.-30.09. Sada za riječ se javio vijećnik Miladin. Izvolite. Imate riječ.

Gradski vijećnik Almedin Miladin: Hvala Predsjedavajući. Mislim da je jedan od najvažnijih dokumenata donošenje Budžeta i danas ovaj nacrt koji imamo ovdje, jedan od važnijih dokumenata za Grad Sarajevo. Ono što imamo u ovakvim diskusijama jeste želja i ono što, i ovamo imamo mogućnosti sa čim Grad Sarajevo raspolaže. Grad Sarajevo nema imovinu. Grad Sarajevo nema zemlju da prodaje, da ubire rentu. Da Budžet na osnovu prihoda nekih znači puni. On ima onoliko koliko je propisano jel, koliko dobavi od Kantona i od drugih nivoa vlasti. Ono što sam ovdje čuo jako su dobri prijedlozi, ali evo apelujem na Komisiju za međunarodnu saradnju da sve ove ovdje iznesene zahtjeve vezano za trgove, za izgradnju ovo da imaju u vidu u bratimljenju, u pravljenju sporazuma o saradnji sa drugim općinama. Uzmite dobre primjere iz drugih općina na nivou Kantona Sarajevo gdje su ti gradovi i ti znači bratimljeni odnosi donijeli ogromne investicije i gdje su oni jako, hajde da kažem jako prijateljski bili za, evo imamo ovdje ove jarbole, imamo jel već znači imamo nešto na tom fonu. Mislim da evo s te strane da bude akcenat posvećen na to da ne bude samo puko bratimljenje ili potpisivanje sporazuma. Ono što je, ja bi pohvalio, jer ovo što radi gradonačelnica i već uputim kontaktima već imamo znači određene rezultate po tom pitanju. Ovdje još bi spomenuo a vezano je za općine. Znači, ja sam naravno za, da Grad učestvuje u finansiranju svih općina. Ali ovdje se stiče dojam da Općina Stari Grad ima neku privilegiju. Moram da to demantujem iz razloga, evo pozivam vas da uzmete analitiku deset godina unazad Budžeta Kantona Sarajevo pa ćete vidjeti koliko je općina Stari Grad dobila i koliko je ona bila na rubu da kažem propasti i puštena zbog politike, zbog ne slaganja gdje su u druge općine desetine miliona ulagane a u općinu Stari Grad znači bilo je da, bilo je godina da nije se ni marka uložila kad je u pitanju Kanton gdje je milijarda budžet. Tako da ne vodimo se lokal patriotskom politikom. Stari Grad je zna se takav kakav jeste. Odatle je i krenuo Grad, odatle je i nastalo Sarajevo. Mislim da nema nikakvog tu, onaj ja se zahvaljujem

Gradonačelnici što je Stari Grad našao mjesto makar ono što se kaže u Gradu da neko stane iza Starog Grada jer to nije u zadnjih 12 godina bio slučaj kad je evo Kanton u pitanju. Jer smo imali taj maćehinski odnos kao Stari Grad zbog politike i zbog svega što se dešavalo. Znae kakve su investicije u Novom Sarajevu bile, u Novom Gradu, u Centru. S tim što je Stari Grad još i ograničen kao općina. On nema zemlju, ne prodaje zemlju da bi se pravili stanovi, da bi se investitorima omogućilo da se ubire renta. Sve druge općine su znači, imaju tu mogućnost i šire se i prave i ubiru odatle ogromne prihode i normalno da moramo malo to gledati s te strane. Ne možemo gledati samo ovaj Grad kao Grad a da ne uzmemo i sve ovu u obzir. Tako evo to su neki moj hajde da kažem zapažanja i prijedlozi, al svakako jel u javnoj raspravi ću dati svoje primjedbe i sugestije. Hvala.

Predsjedavajući Gradskog vijeća Grada Sarajeva Jasmin Ademović: Zahvaljujem vijećniku Miladinu. Za riječ se javila zamjenica Džehverović. Izvolite.

Zamjenica predsjedavajućeg Gradskog vijeća Grada Sarajeva Mirela Džehverović: Ovako, ja ću samo kratko prokomentarisati Nacrt Budžeta. S obzirom da znamo sva dešavanja u proteklom periodu i znam da je pomoćnik gradonačelnice Muamer kad je počeo da radi i na šta je to sve izgledalo i kako je to sve trebalo posložiti ja mislim da nikada nismo imali transparentnije. Ja ne kažem da je to najbolji budžet koji je do sad ovaj Grad imao, niti kažem da je savršen, da ga treba popravljati treba ga popravljati. Meni stvari i ovo, na istom sam fonu kao kolege vijećnici koji su komentarisali prije mene. Budžet je ograničen onoliko koliko je ograniče. Ja bi zaista voljela da mi možemo u odjel stipendija staviti milion maraka. Da Oaza koja je je već, ja ne znam jeste li vidjeli kolegic, već je planirano. To je udruženje od značaja za Grad. Već je planirano 15.000,00 maraka. Znači, sad sa ovim što imam znam da je Gradonačelnica, doslovno mogu reći kosu čupala da to nekako izgleda onako kako treba. Naravno. Nisam ni ja zadovoljna nekim stvarima, ali sve u okviru nacrta, odnosno u sve u okviru javne rasprave dostavit ću svoje prijedloge pa ćemo vidjeti kako će, kako će na kraju izgledati. Hvala puno.

Predsjedavajući Gradskog vijeća Grada Sarajeva Jasmin Ademović: Zamolio bi sada samo da neko pozove mog zamjenika gospodina Stevanovića da se vrati u sali s obzirom da je želio jedan zaključak da predloži ovom Vijeću. Imamo li još? Izvolite gospođu Spahić. Je li replika ili?

Gradska vijećnica Enisa Spahić: ... Oazu ja sam tražila još deset hiljada. Korekcija. Ja se izvinjavam. Hvala.

Predsjedavajući Gradskog vijeća Grada Sarajeva Jasmin Ademović: Ne brini te. Ulazi u zapisnik i u javnu raspravu. Da li imamo još prijavljenih za diskusiju. S obzirom da nema ja zaključujem diskusiju, te bi zamolio kolegu Stevanovića da pročita jedan zaključak prije nego što ja počnem tačku po tačku da stavljam na glasanje ove sada koje smo diskutovali.

Zamjenik predsjedavajućeg Gradskog vijeća Grada Sarajeva Dragan Stevanović: Hvala. U prostorima do gdje ja protegnem noge ima televizor i pratimo sjednicu, ako ne sekirajte se. Dakle, ja predlažem zaključak da Gradsko vijeće Grada Sarajeva uvažavajući trenutnu epidemiološku situaciju u gradu, u državi i u zemljama okruženja predloži Gradonačelnici da se u dogovoru sa suorganizatorima donese odluka da se javni doček Nove godine u gradu Sarajevu u ovoj godini ne održi odnosno otkaže, a planirana sredstva za ovu namjenu da se preusmjere u druge korisne svrhe.

Predsjedavajući Gradskog vijeća Grada Sarajeva Jasmin Ademović: Zahvaljujem kolegi Stevanoviću. Otvaram diskusiju po pitanju predloženog zaključka. S obzirom da nema prijavljenih zaključujem diskusiju. Nisam. Evo molim vas samo kratki budite. Evo. Izvolite. Vijećnica Hašimbegović ima riječ.

Gradska vijećnica Marijela Hašimbegović: Zahvaljujem Predsjedavajući. Ja sam htjela zamoliti uvaženu Gradonačelnicu da je pitam šta ona misli o ovom zaključku da li je, da li je Grad Sarajevo uopće ima neke planove po ovom pitanju. Hvala lijepo.

Predsjedavajući Gradskog vijeća Grada Sarajeva Jasmin Ademović: Hvala vijećnici. Gradonačelnice izvolite.

Gradonačelnica Grada Sarajeva Benjamina Karić: Zahvaljujem se uvaženi Predsjedavajući. Zahvaljujem se uvaženom zamjeniku predsjedavajućeg gospodinu Stevanoviću na predloženom zaključku. Zahvaljujem se uvaženoj gradskoj vijećnici, gospođi Marijeli Hašimbegović na postavljenom pitanju. Prema trenutnoj epidemiološkoj situaciji gdje imamo preporuke Federalnog kriznog štaba da je broj, broj osoba koje se mogu okupljati na otvorenom 300 i da vidimo da postoje pojave novih virusa, novih sojeva virusa. Budući da vidimo i da zemlje u regionu otkazuju svoje javne dočeke mogu reći da sam saglasna sa prijedlogom zamjenika predsjedavajućeg gospodina Dragana Stevanovića da Centralni doček ove godine prvenstveno zbog epidemiološke situacije trebamo otkazati, dakle, Centralni doček a da svakako trebamo razmisliti na koji način na nekoj od narednih sjednici, možda čak na narednoj sjednici razmisliti o sredstvima koje imamo u Budžetu. Dakle, to je 50.000,00 KM koje imamo rezervisane u Budžetu za Doček Nove godine. Da li ćemo ih prebaciti za narednu godinu za doček Nove godine ili ćemo ih ostaviti za neku drugu namjenu za koju se Gradsko vijeće opredijeli da trebaju ići. U svakom slučaju smatram da trebamo biti veoma oprezni. Da trebamo poštovati epidemiološke mjere. Da trebamo pratiti situaciju kako i u Bosni i Hercegovini tako i u regionu. I da smatram da je najvažnije u ovakvoj situaciji i ovakvom trenutnom stanju sačuvati zdravlje naših sugrađana, a sigurna sam da Grad Sarajevo, posebno u saradnji sa gradskim općinama i sa Turističkom zajednicom može uraditi manje događaje koji će svakako unijeti novogodišnju čaroliju i duh novogodišnjih praznika u naš grad i u sve gradske općine. Hvala.

Predsjedavajući Gradskog vijeća Grada Sarajeva Jasmin Ademović: Zahvaljujem gradonačelnici Karić na odgovoru. Vijećnik Srdić replika. Molim vas budite kratki. Znači, sada smo na diskusiji vezano za zaključak. Izvolite.

Gradski vijećnik Srđan Srdić: E hvala. Hvala Predsjedavajući. Replika je mom kolegi uvaženom Stevanoviću. Pa izgleda da se moj kolega Dragan malo zaigrao sa ovim zaključcima, ali obrazložit ću i zašto. Ako se sjećate kad su bile stipendije za našu djecu, ja sam upravo predlagao da se ova stavka od 50.000,00 što je planirano za doček Nove godine usmjeri da se djeci koja nisu ovaj put dobila stipendije a ispunjavaju naravno po ocjenama i kriterijima da dobiju stipendiju, pa vi ste Dragane bili protiv toga. Sad predlažete. Pa ste mi malo nekako kontradiktorni. Ipak ja malo pratim taj rad. Samo ću reći da upravo radi toga neću podržati vaš zaključak. A u tom periodu smo imali još veći broj zaraženih. Tako da mogu vam reći populistički ono kako vi kažete malo ste se zaigrali al eto nema veze. Pratim vaš rad.

Predsjedavajući Gradskog vijeća Grada Sarajeva Jasmin Ademović: Hvala vijećniku Srdiću. Replika zamjenik Stevanović. Izvolite.

Zamjenik predsjedavajućeg Gradskog vijeća Grada Sarajeva Dragan Stevanović: Pa kometat je smiješan, ali i nisam očekivao ništa drugo. Dakle, u ono vrijeme u koje smo donosili odluku o stipendiji nismo znali kako će biti u decembru. Ne znamo ni sad kako će biti u januaru i februaru. Ne znamo ni danas hoće li biti bolje ili gore krajem decembra. Znači, vi sad nešto povezujete sa nečim što apsolutno, ko žabe i babe. Dakle, nema nikakve veze jedno sa drugim.

Predsjedavajući Gradskog vijeća Grada Sarajeva Jasmin Ademović: Zahvaljujem. S obzirom da nemamo više prijavljenih zaključujem diskusiju, te stavljam zaključak koji je pročitao kolega Stevanović na glasanje. Molim sve da se pripremite za glasanje. Konstatujem da je Gradsko vijeće Grada Sarajeva sa 20 glasova „za“, jedan „protiv“, četiri „suzdržana“, jedan vijećnik „nije glasao“, usvojilo zaključak kolege Stevanovića onako kako je i predložen.

Predsjedavajući Gradskog vijeća Grada Sarajeva Jasmin Ademović: Sada prelazimo na glasanje ... to jeste pozivam gradske vijećnike i molim vas samo jedna stavka znači, u predloženim zaključcima u šest stavki samo da se doda na stavku 6., a pisani odgovori na pitanja postavljena tokom rasprava na sjednici Gradskog vijeća će također biti sastavni dio Izvještaja o provedenoj raspravi vezano za Nacrt Budžeta. Znači, sve ovo danas što ste vi postavili pitanja niste dobili odgovora, odgovore dobit ćete ih u Izvještaju. Sada pozivam gradske vijećnike da se izjasne o zaključku kojim bi se Nacrt Budžeta Grada Sarajeva za 2022. godinu uputio u javnu raspravu kako je navedeno u zaključkom sa ovim dodatkom koji sam pročitao. Molim sve da se pripremite za glasanje. Konstatujem da je Gradsko vijeće Grada Sarajeva sa 25 glasova „za“, nula „suzdržanih“, nula „protiv“, jedan vijećnik „nije

glasao“ usvojilo zaključak kojim se Nacrt Budžet Grada Sarajeva za 2022. godinu upućuje u javnu raspravu kako je navedeno u zaključku sa ovim jednim dodatkom.

Predsjedavajući Gradskog vijeća Grada Sarajeva Jasmin Ademović: Idemo dalje. Tačka... gradske vijećnike da se izjasne o zaključku kojim bi se Nacrt Odluke o izvršavanju Budžeta Grada Sarajeva za 2022. godinu uputio u javnu raspravu kako je navedeno u zaključku. Konstatujem da je Gradsko vijeće Grada Sarajeva sa 24 glasa “za”, nula “protiv”, nula “suzdržanih” i dva vijećnika “nisu glasala” usvojilo zaključak kojim se Nacrt Odluke o izvršavanju Budžeta Grada Sarajeva za 2022. godinu upućuje u javnu raspravu kako je navedeno u zaključku.

Predsjedavajući Gradskog vijeća Grada Sarajeva Jasmin Ademović: ... Konstatujem da je Gradsko vijeće Grada Sarajeva primilo k znanju Informaciju o izvršenju Budžeta Grada Sarajeva za period 01.01. – 30.09.2021. godine kako je i podnesena.

Stavovi predlagača:

Odgovori gradskih službi na pitanja gradskih vijećnika Grada Sarajeva:

Gradska vijećnica Biljana Lazarević

1. Obzirom da još nisu okončane procedure tehničkog prijema i upotrebne dozvole, pa samim tim ni postupak raspisivanja javnog poziva za davanje u zakup objekata „Vidikovac“ i „Bistrička stanica“, nakon okončanja istih, u narednoj 2022. godini, možemo očekivati da prihodi od iznajmljivanja poslovnih prostora budu uvećani za iznose zakupnina od ova dva objekta.
2. U skladu sa pozitivnim propisima, zaštita od požara djelatnost od posebnog interesa za Federaciju, kanton, grad i općinu, te kanton, općine, gradovi, pravna lica i druge institucije mogu materijalno i na drugi način pomagati dobrovoljna vatrogasna društva u obavljanju poslova iz njihove nadležnosti. Shodno prednjem, Grad Sarajevo planira i realizuje finansijska sredstva, kao podršku projektima dobrovoljnih vatrogasnih društava na području gradskih općina i to:- Vatrogasno društvo „Vratnik“;- Vatrogasno društvo "Alipašin most; - Vatrogasno društvo Bjelave; - Vatrogasno društvo „Novo Sarajevo 1934“. Podrška Grada Sarajeva je neophodna za funkcionisanje navedenih društava tj. za vršenje njihove osnovne zadaće, kao i za registraciju i održavanje vozila, nabavku goriva, stručno obučavanje, osposobljavanje i osiguranje vatrogasaca, nabavku hrane za vatrogasce na intervencijama i dežurstvima, nabavku opreme potrebne za intervencije itd. Planirana sredstva u Budžetu Grada Sarajeva bit će raspoređena ravnomjerno na navedena društva, u skladu sa predloženim projektima, odnosno njihovim značajem.
3. Djelatnost Sindikalne organizacije organa Grada Sarajeva finansira se iz sredstava članarine i drugih prihoda, među kojima su i sredstva koja se svake godine odobravaju u Budžetu Grada Sarajeva. Članarina i drugi prihodi služe za finansiranje rada Sindikalne organizacije i svih njenih organa. Finansijsko-materijalno poslovanje u Sindikalnoj organizaciji organa Grada Sarajeva vrši se u skladu sa Pravilnikom o kriterijama za ostvarivanje finansijske pomoći i drugih materijalnih davanja koja se dodjeljuju članovima Sindikalne organizacije organa Grada Sarajeva, broj So-9/19 od 17.04.2019. godine. Pravilnikom o kriterijama za ostvarivanje finansijske pomoći i drugih materijalnih davanja koja se dodjeljuju članovima Sindikalne organizacije organa Grada Sarajeva utvrđeni su uslovi, procedura, kriteriji, iznos i način ostvarivanja finansijske pomoći i drugih materijalnih davanja, koja se dodjeljuje članovima Sindikalne organizacije organa Grada Sarajeva. Pravilnikom je utvrđeno da se finansijska pomoć članovima sindikalne organizacije, u skladu sa raspoloživim sredstvima, dodjeljuje u slučajevima težih ili teških oboljenja, smrti, obavljanja skupih ljekarskih pregleda, nabavku skupih lijekova, naknadu štete od elementarnih nepogoda,

penzionisanje i rođenje djeteta. Pored navedenog, sredstva koja su do sada uplaćivana iz Budžeta Grada Sarajevo utrošena su i za brigu o materijalnom i socijalnom položaju članstva, organizovanje prigodnih druženja i izleta, brigu o preventivnom djelovanju u cilju što kvalitetnije zdravstvene zaštite, učešće u Sindikalnim aktivnostima, u cilju njegovanja sindikalne kolegijalnosti i prijateljstva, te podizanje i unapređenje psiho-fizičke i radne sposobnosti sindikalnog članstva – uposlenika.

4. Zavod Pazarić će se tek od 2022. godine nalaziti u budžetu Grada Sarajeva, što do sada nije bio slučaj. Poštujući značaj ove institucije i njihov rad sa štíćenicima, Grad Sarajevo u skladu sa svojim mogućnostima je planirao podršku u iznosu od 20.000 KM. Ukoliko bude prostora u budžetu narednih godina, Grad bi vrlo rado razmotrio mogućnost povećanja stavke.
5. Razlog zbog kojeg se Javna ustanova Biblioteke Sarajeva nije našla u prijedlogu budžeta za 2022. godinu jeste to što pomenuta ustanova nije predala zahtjev za finansiranje iz budžeta Grada Sarajeva. Naime, Javna ustanova Biblioteke Grada Sarajeva je u proteklom periodu dostavljala zahtjev za finansiranje, za nabavku knjižnog fonda, ili za neku drugu aktivnost. Međutim, obzirom da ove godine nije došao zahtjev za bilo kakvu vrstu sufinansiranja, Služba nije imala osnova da pomenutu ustanovu uvrsti u budžet.
6. Obzirom da budžetom nisu planirani pojedinačni projekti osnovnih škola u budžetu Grada Sarajevo za 2022 godinu je planirana stavka „Sufinansiranje projekata iz oblasti obrazovanja u osnovnim i srednjim školama“ gdje škole mogu dobiti podršku Grada za projekte obrazovnog karaktera sa kojima apliciraju. Kada se radi o kapitalnim ulaganjima u osnovne i srednje škole, ovakve vrste ulaganja su predviđene projektnim aktivnostima Odsjeka za pripremu projekta, koji su u prethodnom periodu imali vrlo uspješne rezultate, poput projekta poboljšanja energetske efikasnosti u OŠ Saburina. Škola svakako treba uputiti zahtjev, biće razmatran i podržan u skladu sa mogućnostima.

Gradska vijećnica Danijela Šahat:

7. Budući da nismo zaprimili zvaničan dopis Općine Novo Sarajevo, kojim bi nas upoznali sa predmetnim aktivnosti i inicirali saradnju na Projektu Sportsko-rekreativnog centra Vinko Šamarlić i Park šume Hum, te predložili iznos potrebnih sredstava za isti, Služba nije u prijedlogu budžeta Grada Sarajeva za 2022.godinu uvrstila sredstva kojim bi Grad Sarajevo dao doprinos u realizaciji projekta.
8. Grad Sarajevo već duži niz godina podržava porodice sa troje i više djece kroz stipendiranje učenika sa stavke „Stipendiranje djece iz socijalno ugroženih porodica“. Naime, kao poseban kriterij prilikom bodovanja učenika uzima se socijalno stanje i broj djece u domaćinstvu, gdje porodice sa troje i više djece ostvaruju dodatne bodove što u konačnici znatno povećava šanse za dobivanje stipendije.
9. Javna ustanova Centar za odgoj i obrazovanje i rehabilitaciju Vladimir Nazor je u 2020. godini aplicirala s projektom obnove kuhinje, te je na osnovu navedene aplikacije u budžetu 2021. godine planirano 30.000 KM. Budžetom za 2022. godinu Grad je planirao podršku projektima Zavoda Pazarić koji se prvi put našao u budžetu Grada, a kako bi se ravnomjerno podržavale institucije ovog tipa. Grad je i ovom budžetu planirao sredstva za finansiranje projekta opremanja kuhinje Javne ustanove Centar za odgoj i obrazovanje i rehabilitaciju Vladimir Nazor u iznosu od 5.000 KM što predstavlja ¼ ukupnog iznosa projekta. Iako je navedeni centar u nadležnosti KS, razumijevajući značaj pomenute institucije, Grad je u skladu sa svojim mogućnostima podržao ovaj projekat.

Gradski vijećnik Srđan Srdić:

10. U vezi pitanja o financiranju sportskih klubova FK Sarajevo i FK Željezničar. Obzirom na skromni budžet Grada Sarajeva, suma od 50.000 je izuzetno visoka, posebno imajući u vidu da će se svim ostalim sportskim kolektivima i udruženjima iznos od 100.000 KM raspodijeliti putem Javnog poziva. Smatramo da to dovoljno govori o povlaštenom položaju pomenutih klubova i odnosu Grada spram njih. Predloženo povećanje bi ujedno značilo smanjenje, ili ukidanje mnogih drugih, ionako skromnih stavki, što u ovom trenutku nije moguće.
11. Planiranim sredstvima za KJKP Park u iznosu od 240.000 KM predviđene su aktivnosti koje se nalaze u nadležnosti Grada Sarajeva, a koje se odnose na održavanje korita rijeke Miljacke, održavanje zelenih kosina korita, krčenje šiblja, čišćenje otpada iz korita i slično. Također, sa navedenim sredstvima planiramo preko KJKP Park održavati Bijelu Tabiju, Jajace kasarnu, žardinjere u Titovoj ulici, sadnju cvijeća, orezivanje stabala i sadanju novih stabala, kao i sadanju žive ograde uz korito Miljacke i ostale mnogobrojne aktivnosti na održavanju i unapređenju zelenila u Sarajevu.

Gradska vijećnica Marijela Hašimbegović:

12. U posebnom dijelu budžeta, Grad Sarajevo se ne prikazuje kao potrošačka jedinica, već gradske službe koje čine Gradsku upravu, prikazane su u Budžetu kao potrošačke jedinice. Razlog ovakvog prikaza, kroz potrošačke jedinice, je da se uspostavi efikasnije i transparentnije izvršavanje budžeta, kao i nadležnosti gradskih službi prikazanih kroz projekte. Ovim pristupom nije bila namjera da se gradske službe izjednače sa ministarstvima i javnim preduzećima, niti je to moguće jer se Grad Sarajevo, kao jedinica lokalne samouprave vodi kao jedan budžetski korisnik. Gradsko vijeće, Pravobranilaštvo Grada Sarajeva i gradske službe su potrošačke jedinice koje imaju finansijske planove izdataka, ali se ne iskazuju pojedinačno u posebnom dijelu budžeta. Kroz Odluku o izvršavanju Budžeta Grada Sarajevo za 2022. godinu definisat će se ovakav način planiranja budžeta.
13. Plaće i naknade troškova zaposlenih i doprinosi za plaće su planirani na osnovu važećih propisa prema postojećoj strukturi zaposlenih u Gradu Sarajevu. Planirani nivo sredstava za bruto plaće iznosi 3.205.000 KM i utvrđen je na osnovu plana za 2022. godinu, koji predviđa 124 uposlena.

Naknade troškova zaposlenih planirane su u iznosu od 381.026 KM i smanjene su u odnosu na 2021. godinu za 22,24.%. Smanjenje se odnosi najviše na naknade za otpremnine, jer u 2022 godini samo nekoliko uposlenih će steći pravo na penziju odnosno isplatu otpremnine. Također, došlo je i do smanjenja naknada za jubilarne nagrade, darovi djeci, te naknade u slučaju smrti i teže invalidnosti, a iste su planirane na nivou izvršenja za 2021 godinu.

- Doprinosi poslodavca su planirani u ukupnom iznosu od 350.000 KM, te su obračunati u skladu sa zakonskim propisima. Njihovo povećanje se zasniva isključivo zbog povećanja osnovice tj. iznosa minimalne satnice sa 2,23 na 2,27. Iako se minimalna satnica povećala planirana sredstva za plate su ostale na nivou 2021. godine iz razloga što je veći broj uposlenih u 2021. godini stekao pravo na penziju, tako da će planirani iznos biti dovoljan. Povećanje osnovice ne utiče na porast ili smanjenje naknada troškova zaposlenih jer se isti isplaćuju po zakonskim propisima kako slijedi;

- Naknada troškova prijevoza na posao i sa posla; 53 KM na mjesečnom nivou
- Naknade za topli obrok; 1% prosječne plate FBiH
- Naknade za regres; 50% prosječne plate FBiH
- Naknada za otpremnine; 5 zadnjih prosječnih plata uposlenika
- Naknada u slučaju smrti; 4, a u slučaju bolesti i teže invalidnosti 2 prosječne plate u FBiH.

| Ekon.kod | Sub-analitika | Funkcija | OPIS | Budžet Grada Sarajevo za 2021. godinu | Budžet Grada Sarajevo za 2022. godinu |
|---------------|---------------|----------|---|---------------------------------------|---------------------------------------|
| 611200 | | | Naknade troškova zaposlenih | 490.000 | 381.026 |
| 6112 | | 011 | Naknade troškova prevoza na posao i s posla | 70.000 | 70.000 |
| 6112 | | 011 | Naknade za topli obrok | 200.000 | 200.000 |
| 6112 | | 011 | Naknade za regres za godišnji odmor | 55.000 | 55.000 |
| 6112 | | 011 | Otpremnine zbog odlazka u penziju | 90.000 | 10.000 |
| 6112 | | 011 | Jubilarnе nagrade, darovi djeci i slično | 20.000 | 6.026 |
| 6112 | | 011 | Naknade u slučaju smrti i teže invalidnosti | 55.000 | 40.000 |

14. Grad Sarajevo ima veoma razvijenu međunarodnu saradnju sa 30 pobratimskih i 13 partnerskih gradova, kao i članstvo u 12 međunarodnih asocijacija. Također, Grad Sarajevo aktivni je učesnik mnogih konferencija i seminara na međunarodnom nivou. Iako bi se zbog navedenih razloga moglo opravdati povećanje putnih troškova, isti su kroz Prijedlog budžeta Grada Sarajevo za 2022. godinu vraćeni na nivo planiran u 2021. godini.
15. Iznos stručnih usluga se povećao isključivo zbog troškova koji su planirani za Eksternu reviziju. Ukupno od iznosa 77.000 KM koji je planiran na poziciji stručne usluge 50.000 se odnosi na troškove eksterne revizije.

| Ekon. kod | OPIS | Nacrt Budžeta Grada Sarajevo za 2022. godinu |
|-----------|---|--|
| 6139 | Stručne usluge (NAV, BREP, Eksterna revizija) | 77.000 |

16. Monografija Grada Sarajeva završena je u martu 2020. godine. Urađena je na bosanskom jeziku. U Nacrtu Budžeta za 2022. godine predviđeno je da se radi prijevod i štampa na engleskom jeziku. Protokolarni budžet je u odnosu na prethodnu godinu smanjen za 6.000 KM, što je jasno vidljivo iz tabele. Ovdje su samo neke usluge reprezentacije zbog svoje prirode prebačene na usluge protokolarne reprezentacije, ali u zbiru ukupan iznos reprezentacije je manji u odnosu na 2021 godinu.

| Ekon.kod | Sub-analitika | Funkcija | OPIS | Budžet Grada Sarajevo za 2021. godinu | Budžet Grada Sarajevo za 2022. godinu |
|----------|---------------|----------|------------------------------------|---------------------------------------|---------------------------------------|
| 6139 | | 011 | Usluge reprezentacije | 107.000 | 8.000 |
| 6139 | | 011 | Usluge protokolarne reprezentacije | 80.000 | 173.000 |

17. Budući da nismo zaprimili zvaničan dopis, kao i da Grad Sarajevo nema dokumentaciju za obnovu fasade Narodnog pozorišta, iz tih razloga navedeni projekat nije našao svoje mjesto u

Budžetu Grada Sarajevo. U 2022 godini je planirano provođenje aktivnosti na geodetskom snimanju i izradi projekta za izvođenje radova na obnovi pomenute fasade.

Gradska vijećnica Alma Čengić

18. Kako bi dao što jasniji odgovor na pitanja uvažene Gradske vijećnice prvo ću citirati definiciju tekućih transfera iz kontnog plana FBiH.

Pod tekućim transferima podrazumijevaju se sva izvršena nepovratna davanja za tekuće svrhe, tj ona nepovratna davanja koja nisu data u svrhu nabavke kapitalne imovine. Kategorija konta 614000 je u analitičkom kontnom planu razrađena prema primaocima kojima se daju transferi za tekuće svrhe.

Tekući transferi podrazumijevaju i sve isplate i nepovratna davanja opće prirode drugim nivoima vlasti, za koje svrha nije unaprijed određena, pa čak i onda ako se ta sredstva kod primatelja djelomično koriste za finansiranje nabavke stalnih sredstava (kapitalne imovine). To znači da se kod davatelja transfera kao tekući transferi iskazuju i svi oni transferi čija namjena nije unaprijed definirana, a da je pravo korisnika takvih transfera da sami određuju namjene u koje će ih iskoristiti.

Pod subvencijama se podrazumijevaju sva izvršena nepovratna davanja iz budžeta, javnim ili privatnim poduzećima, poduzetnicima, financijskim institucijama ili posebnim tržišnim proizvođačima (obrtnik, seljak i drugi proizvođači usluga na tržištu). Subvencije se koriste pod različitim nazivom i to regresi, kompenzacije, premije, nadomjesci, povrati i dr. Njihova najčešća namjena je: **smanjivanje cijene za konačnog korisnika, stimuliranje proizvodnje-poticanje proizvodnje, zaštita standarda stanovništva i dr.**

Možemo zaključiti iz gore opisnog dijela tekućih transfera da sredstva koja su namijenjena kao transfer javnim ustanovama u Budžetu Grada Sarajeva za 2022 ne podliježu definiciji subvencije koja je jasno opisala na šta se odnosi, te su ista planirana na odgovarajućoj poziciji 614100 - Tekući transferi drugim nivoima vlasti. Naime predviđena sredstva koja će biti doznačena Javnim ustanovama će se koristiti za finansiranje tekućih obaveza, dok neke ustanove će koristiti sredstva čija namjena nije unaprijed definirana, a da je pravo korisnika takvih transfera da sami određuju namjene u koje će ih iskoristiti.

19. Budžetom za 2020. godinu planirano je 100.000 KM za stipendiranje učenika, kao i svih prethodnih godina. Rebalansom te godine je stavka uvećana na 540.000 KM obzirom da se mnogi planirani projekti nisu mogli realizovati zbog pojave virusa Covid-19, te se u tom trenutku stvorili uslovi za takvo povećanje. Prvo planirano povećanje stipendija desio se 2021. godine kada se iznos od 100.000 KM povećao na 400.000 KM, što je bilo drastično uvećanje sredstava predviđenih za tu poziciju. Međutim, zbog novonastalih okolnosti, smanjenog priliva sredstava zbog pandemije, kao i mnogo većih izdataka Grada u ovoj godini poput kreditnih sredstava, Grad nije u mogućnosti planirati tako visoku sumu. Smatramo da i planirana suma od 300.000 KM predstavlja značajno uvećanje u odnosu na prethodne godine kada se planirao tri puta manji iznos. S obzirom na uvećan broj pristiglih zahtjeva i vijećničkih inicijativa za pružanje podrške i pokroviteljstvo Grada Sarajeva mnogobrojnim projektima, a i nakon iskustva iz prethodnih godina kad smo morali raditi preraspodjele sa drugih stavki na pokroviteljstvo, bili smo prinuđeni povećati planirani iznos za ovu namjenu.
20. Članom 16. Stav 1., tačka 7. i 10., Statuta Grada Sarajeva propisane su nadležnosti u oblasti lokalnog biznisa i turizma. S tim u vezi, pravo i obaveza Grada Sarajeva je da podržava takvu vrstu projekata i aktivnosti. Sarajevska Skenderija svake godine organizira sajamske manifestacije koje doprinose razvoju lokalnog biznisa i turizma. „Sarajevski festival turizma” i

kulturno zabavna manifestacija „Zimska čarolija” su događaji koji zaslužuju pažnju i podršku. „Sarajevski festival turizma” je u funkciji unapređenja ponude sarajevskih turističkih potencijala u turizmu, ali i uvezivanja turističke ponude u FBiH i BiH. Tim povodom Grad Sarajevo i gradonačelnica Sarajeva može organizirati u Vijećnici večeru dobrodošlice za sve učesnike ove sajamske manifestacije, te im osigurati turistički obilazak grada. Organizatori tradicionalno daju mogućnost Gradu Sarajevu da bude istaknut na svim reklamnim materijalima kao i prezentaciju na samom događaju. Ovakvi događaji su u funkciji i drugih uslužnih djelatnosti u Sarajevu, a što predstavlja indirektnu podršku i drugim, lokalnim privrednim subjektima. Također, KJP Skenderija tradicionalno organizira na platou Skenderije zabavnu manifestaciju “Zimska čarolija” koja kvalitativno unapređuje zimsku turističku ponudu u Sarajevu, ali i pruža zabavno-rekreativni sadržaje (svjetlosnu dekoraciju, klizalište itd.) građanima Sarajeva. Pored toga, ona je mjesto okupljanja sarajevske djece koja provodi svoje slobodno vrijeme na otvorenom, a ne zatvorenom prostoru i na taj način doprinosi smanjenju rizika od prenošenja zaraze virusom COVID Dakle, podrška ovakvoj aktivnosti je višestruka, te je ista planirana u skladu sa kontnim planom.

21. Rekonstrukcija i adaptacija stalnog sredstva se može raditi i ako nismo vlasnici stalnih sredstava. To je regulisano Ugovorom o korištenju zgrade ili nekog objekta ako je to korištenje dato na period duži od 10 godina. Rekonstrukcija mora biti planirala na kontu 821600 Rekonstrukcija i investiciono održavanje i to jeste kapitalni izdatak jer je izdatak koji povećava vrijednost postojećeg sredstva u ovom slučaju objekta kasarne Jajce i zgrade SDK. Što se tiče knjiženja ono se ne može evidentirati kako sredstvo u vlasništvu Grada Sarajeva jer to nije. Zakon o računovodstvu striktno kaže da se amortizacija ne radi na ulaganja u tuđa sredstva. Stvarni vlasnik treba na osnovu faktura povećati vrijednost pomenutog sredstva.
22. Udruženju Oaza je Budžetom za 2022. godinu planirano uvećanje sredstava na 15.000 KM, što predstavlja tri puta veći iznos u odnosu na prethodne godine. Grad Sarajevo ovim sredstvima će finansirati realizaciju projekta dječjeg igrališta za potrebe korisnika Udruženja Oaza, a u saradnji sa Gradom Istanbulom će osigurati i prilagodni mobilijar izrađen namjenski za njihove potrebe. Želja Grada Sarajeva je da svim udruženjima koja pružaju podršku bolesnoj djeci i djeci sa poteškoćama u razvoju i kretanju uveća sredstva, međutim to nažalost nije moguće zbog ograničenog budžeta. Na primjeru Udruženja Oaza, može se razumjeti opredjeljenje Grada Sarajeva da, kada god se stvori mogućnost, podrži projekte od vitalnog značaja za pomenuta udruženja. Razumijevajući značaj Udruženja oboljelih od celijakije „No Gluten“ Kantona Sarajevo, pomenuto udruženje se već duži niz godina nalazi u budžetu Grada, te je na taj način prepoznato kao prioritetno i samim time je u povlaštenom položaju u odnosu na slična udruženja koja nisu uvrštena u budžet. Nažalost, obzirom na postojeće obaveze Grada Sarajeva, i smanjen Budžet, nismo u mogućnosti povećati postojeći iznos.
23. Budući da nismo zaprimili zvaničan dopis Općine Novi Grad, kojim bi nas upoznali sa predmetnim aktivnostima i inicirali saradnju na realizaciji Projekta rekonstrukcije Trga Barcelone, nismo mogli planirati sredstva u prijedlogu budžeta GS za 2022.